

San Judas chũ'o tocha saosi'ea'me

Dios chẽacojñosinare Judas tocha saosi'ea'me

¹ Chũ'u, Judas, Santiago cho'jeuji, Jesucristo chũ'ũñe cho'okaikũji mũsanũkonare ija'ovana ie chũ'o tocha saomu, mai Ja'ku Diopi oiũ chẽa paakũna Jesucristo cu'ache ãsekaicojñonare.

² Diopi mũsanũkonare chiiũ oiũ rekoñoãna re'oja'che pa'iche karama'ñe ãsikũ paau.

Jorechũ'o che'chona pa'iche'me

³ Asarepajũ'u, chũ'u majapãijana chũ'u cuasana. Mũsanũkonare Dios re'oja'che pa'iche jo'kasi'ena'me Repau maire vati toa saoche ãsekaiche'te kũakũ ruu tocha saouache cuasaku pa'isi'kua'mũ chũ'u mũsanũkonare. Jã'ata'ni chura chekere kũakũ chũ'vachũ'ore tocha saoche pa'imũ chũ'ure, mũsanũkonapi Diore masi cuasache'te peore cho'ore'ochetũ'ka cho'oju cuasaju maire Repau neenare jo'kasi'ere ũcua cuasaju paaru chini. ⁴ Pãipi ruu joremasinapi te'ena mũsanũkonani ja'me jovo chi'ijũna, jã'aja'ñe kũakũ tochache pa'imũ chũ'ure, Dios chũ'o pa'ikorovu aperũmũ, "Repana cu'ache cho'osi'e ro'ijanana'me", chiiche tocha kũacojñosinapi mũsanũkonani ja'me pa'ijũna. Cu'anajeju ija'che chũ'vame repana: "Mai Cuasakũji Diopi maini oiũ cu'ache cho'oche cuasamaũna ũcuauache cu'ache cho'oto

re'omu", chijju chu'vaju Maire Paaku'te Jesucristo'te Mai Aire jachaju pa'inaa'me repana.

⁵ Ie ũcuare masinareta'ni mʉsanʉkonapi cuasaju che'chea'ju chini kuara chiimu chu'u: Maire Paaku Dios Israelpai Egipto cheja pa'isinare etua ra Repau chu'uñe asa jachaju cuasamanare pai peochejana jūnisōñe chu'ʉasomu.

⁶ ũcuachi'a ángeles te'enare Repau chu'u jo'kasi'ere pa'icuheju repanare ʉachechi'a pañu chijjuna Repau pa'icheja eto si'arumu chijacheja pa'ichejana chea quēo sʉo paacheja'che paamu Dios repanare, ũcuanʉko cho'osi'e ro'iche Repau chu'ʉumucusejatuka.

⁷ Aperumu pa'isina Sodoma vʉ'ejoopo canana'me Gomorra vʉ'ejoopo pa'ina repajoopō kueñe cajoopō pa'inana'me cho'ocojñosi'e ũcuachi'a cuasajū'u. Repana pa'imanare ũcuʉanare ja'me kaiju, ʉmʉpai ũcuajanare ʉmʉneeju ũcuachi'a romi ũcuajanare romineeju cheke si'ache cu'a cho'ojū pa'ijuna Dios repanani pe'rukʉ sējokʉ cho'ʉna toa chachamañe uutoapi tuāni ʉosōasomu, repana cu'ache cho'osi'e ro'i. Jā'aja'ñe cho'oasomu Dios maipi repana cho'ocojñosi'ere cuasa kʉku cu'ache cho'oma'ñe pa'iju re'oja'chere cho'ojū che'chea'ju chini.

⁸ Repana, mʉsanʉkona pa'icheja pa'ina, cu'ache che'chona ũcuaja'che repana ʉo kāni ñañechi'are che'choju repana ca'nivʉapi cu'ache cho'ojū, Maire Paaku chu'uñejē'e jachaju cuheju, cʉnaumu pa'iju chu'ʉnare ñomanarejē'e vajuchuma'ñe cu'ache

cutunaa'me. ⁹ Angeles chũ'ukuta'ni Miguel, repaũ Moiseni tãra chini vati aina'me cavarũmũ, repaũni vajũchũkũ cu'ache i'kama'ñe, "Diopi mũ'ũ cu'ache cho'osi'e ro'i chũ'ũa'kũ", chinasomũ repaũ'te. ¹⁰ Repana jorechũ'o che'chonata'ni repana ñamamajñarũãna'me ñamanare cu'ache i'kanaa'me. "Rũa masinaa'me chũkũna", chiinata'ni cu'ava'na masichechi'a masinaa'me. Repana masichechi'a cho'oju si'arũmũ na'a rũa cu'ache cho'oju cho'osõju pa'ime repana.

¹¹ Repanapi Caín pa'isi'ēja'che pa'iju chekũnarejẽ'e cuasama'ñe cu'are cho'ojuña Diopi chũ'ũna rũa chũova'nare cu'ache ti'jñeja'mũ repanare. Ũcuachi'a kurire kooũu chini Balaam cho'osi'ēja'che cu'are ũcuachache cho'oju pa'ime. Ũcuachi'a Coré cho'osi'ēja'che Dioni jachaju cho'osõjanaa'me repana, jachache ro'i.

¹² Mũsanũkona chi'i sãiñechi'a cuasaju pojuũ ãu ãirũmũ ja'me chi'i chekũnare jmakarũjẽ'e ña kũkũma'ñe vajũchũache ñoñe cho'oju rũa soju cono ũkujũ ãu ãinaa'me repana. "Chekũnare pãi kuiranaa'me chũkũna", chiinata'ni repanachi'a meñe kuiranaa'me. Jã'aja'ñe cho'oju oko rara chini rama'ñe tuta saochēja'che jorenaa'me repana. Ũcuachi'a sũkiñũã repañũã ãiñe kũirũmũ tí'ato kũimañũãja'ñe pa'ime. Saivũãre ruta ũharena jũnisõsiñũãja'ñe pa'ime repana. ¹³ Ũcuachi'a repana cu'ache cuasache chiachaji fa'akũna sui'rika rũa meno ji'richeja'che rũa i'kaju vajũchũache cho'o ñoju pa'inaa'me repana.

Ma'jñoko repana ku'ima'ña saijũ cavesũsõ tĩĩne saicheja'che cu'ache pa'ijũ Diopi chũ'ũna rũa chijachejare ai sani pa'ijanaa'me repana.

¹⁴ Ūcuachi'a Enoc Adán majanajeũ mamakũ majanajeũ chĩ pa'isi'kũ Dios chũ'ore kũakaiũ repana jorena cho'ocojñojañe ija'che kũakũ i'kaasomũ: “Diore Repaũ neena ángeles rũa jainũkona'me raiũna ñamũ chũ'ũ. ¹⁵ Pãĩ ũcuanũko cho'osi'ere ro'iche chũ'ũra chini raimũ. Cu'anani repana cu'ache cho'osi'e ro'i, ũcuachi'a cu'anajejũ Repaũni jachajũ cuhejũ cu'ache i'kasi'e ro'ia'jũ chini chũ'ũra chini raimũ Repaũ”, chiniasomũ repaũ Enoc. ¹⁶ Repana jorena si'arũmũ ke'rechechi'a pa'ijũ, cu'ache i'kajũ repanare uachechi'a cu'ache cuasanaa'me. Repana pa'ichechi'a meñe i'kajũ pojonapi, chekũnare ũcuananani re'oja'che cho'okaarũ chini jorejũ re'oja'cheja'che i'kanaa'me repana.

Ñarepajũ pa'ijũ'ũ; jorenapi cacũ'ojũ

¹⁷ Jã'ata'ni mũsanũkona chũ'ũ majapãijana chũ'ũ cuasana, asarepajũ'ũ. Maire Paakũ Jesucristo saosina mũsanũkonare kũasi'e cuasajũ'ũ, ija'che i'kasi'e: ¹⁸ “Na'a pa'isirũmũ Jesucristo chuta'a jo'e raimarũmũ pãĩ mũsanũkonana'me pa'ina Repaũ'te masi cuasamanajejũ pãisojanaa'me mũsanũkonare, repanare uachechi'a cu'ache cho'ojũ pa'inajejũ”, chiisinaa'me. ¹⁹ Jã'aja'ñe i'kacojñosina mũsanũkonana'me pa'ina jorena ũcuanaa'me. Jesure cuasamana pa'iche pa'ijũ Dios Rekocho'te peojũ ũcuauache cho'ojũ cacũ'ojũna pãĩ te'ekuanuchi'a kũñũsõjũ pa'ime.

20 Jã'ata'ni musanukona chu'u majapãijana chu'u cuasana, asarepajũ'u. Musanukona cuasache'te Dios chu'o na'a raa che'cheju masi rũhiñe pa'ijũ'u. Ũcuachi'a Dios Rekocho kuache'te sêeju pa'ijũ'u Repau'te. 21 Dios maire oiche'te cavesuma'ñe cuasaju ũcuachi'a Maire Paaku Jesucristo maini oia Dios pa'ichejana ai sajaumucusere cuasaju cha'aju pa'ijũ'u.

22 Masi cuasamanare oiju cho'okaijũ'u, masi cuasaa'ju. 23 Toana tuãnisõcuhanaja'ñe cu'ache pa'inare tũseju chëa kuñoñeja'ñe cho'okaijũ'u. Chekunare cu'ache cho'onare oiju repaña cho'ochë ña ũseju repaña cho'ochëja'che cho'oma'ñe re'oja'chere che'choju pa'ijũ'u.

Dioni pojokũ i'kasi'ea'me

24-25 Dios Ũcuate'euji Maire Paaku Jesucristo cho'okaisi'ejekũna maire vati toa sani uuche ũsekaikũji peore Masikũji cho'okaiũna Repau'te cuasache ũhasõma'ñe cuasaju re'oja'che pa'iju raa pojojũ pa'ijanana'me. Jã'ajekũna Repau'te cuasache ũhasõmaneni cu'ache peonapi Repau'te re'oja'che ñokũ'te ti'jñeñe sani re'oja'che pa'ijanana'me mai. Dios re'oja'che pa'iu, Aijekũ Pãĩ Ũcuanukore Paaku, peore Masiujukũ chuta'a cheja peorũmujẽ'e pa'iu irũmujẽ'e pa'iu si'arũmu pa'ikũ'mũ Repau. Re'omũ.

Judas

Dios Chu'o Kuaphuro
Koreguaje: Dios Chu'o Kuaphuro New Testament
copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022
87a345ac-83c6-51ad-8750-17a703f38bcc